

10. EPIDENDRUM (*nocturnum*) caule multifolio; nectarii labio tripartito, integro; lacinia intermedia lineari. TAB. CXXXIX.

Planta vix pedalis, parasitica arborum. *Radices* teretes, fibrosæ. *Caulis* teres, simplex, glaber, circiter quinquefolius. *Folia* oblonga, obtusa, integerrima, coriacea, nitida, avenia, vaginancia, alterna, subdisticha, fere tripollicaria. *Flores* tripollicares, sessiles in *spadice* brevissimo *spathisque* paucissimis vestito, bini plerumque, rarissime tres, interdum inodori, noctu odorem exhalantes suavissimum, qui aliquid cum liliis albis commune habet; *petalis* e viridi luteis; *nectarii* albi laciniis lateralibus nulla cilia emittentibus, hinc petalis duplo brevioribus. Reliqua, ut in charactere *Ep dendri ciliaris*; sed de staminibus nihil dico, quum illa in floribus, quos ego examinavi, omnibus deciderant cum nectarii cucullis.

Habitat in sylvis montosis Martinicæ.